

გადაწყვეტილება

N გ-21-12/216
08/04/2021

216-გ-21-1-4-202104081016



შპს „სეზონი ტვ“-ის მაუწყებლად ავტორიზაციის განცხადების განხილვის თაობაზე

საქართველოს კომუნიკაციების ეროვნული კომისია (შემდგომში „კომისია“) აღნიშნავს, რომ კომისიას განცხადებით მიმართა შპს „სეზონი ტვ“-იმ (ს/ნ 417897253) (კომისიაში რეგისტრაციის №მ-21-7/1415, 24.03.2021) ”მაუწყებლობის შესახებ” საქართველოს კანონის შესაბამისად ავტორიზაციის გავლის თაობაზე. კერძოდ, განცხადების შესაბამისად, შპს „სეზონი ტვ“ ითხოვდა მაუწყებლობის სფეროში ავტორიზაციას შემდეგი პირობებით:

- ა) მაუწყებლობის სახე: ტელემაუწყებლობა;
- ბ) მაუწყებლობის სახეობა: სათემო მაუწყებლობა;
- გ) მაუწყებლობის ქვესახეობა: საერთო მაუწყებლობა;
- დ) მაუწყებლობის ენა/ენები: ქართული;
- ე) მაუწყებლობის მინიმალური ხანგრძლივობა დღე-ღამის განმავლობაში: 6 საათი;
- ვ) მაუწყებლობის გავრცელების ტექნოლოგია და აღნიშნულის შესაბამისად მაუწყებლობის გავრცელების გეოგრაფიული არეალი:
 - ვ.ა) ინტერნეტი (საქართველო);
 - ზ) მაუწყებლობის ხელმისაწვდომობა:
 - ზ.ა) ინტერნეტი - უფასო;
- თ) მაუწყებლობის დაწყების ვადა - ავტორიზაციის გავლიდან 40 დღეში;

როგორც განცხადებაშია აღნიშნული სატელევიზიო არხის ბრენდული სახელწოდება იქნება „სეზონი ტვ“.

კომისია აღნიშნავს, რომ შპს „სეზონი ტვ“-ის მიერ კომისიაში წარმოდგენილია „მაუწყებლობის შესახებ“ საქართველოს კანონის 45¹ მუხლით გათვალისწინებული დოკუმენტაცია, კერძოდ:

1. კომპანიის განცხადება;
2. შპს „სეზონი ტვ“-ის ამონაწერი მეწარმეთა და არასამეწარმეო (არაკომერციული) იურიდიული პირების რეესტრიდან;
3. განსახორციელებელი საქმიანობის დაფინანსების გეგმა და ინფორმაცია დაფინანსების წყაროების შესახებ;
4. საკუთარი პასუხისმგებლობით შევსებული შესაბამისობის დეკლარაცია;
5. საკუთარი პასუხისმგებლობითა და ”მაუწყებლობის სფეროში ლიცენზიის მისაღებად ფიზიკური და იურიდიული პირების მიერ წარმოსადგენი ქონებრივი დეკლარაციების ფორმების დამტკიცების თაობაზე” კომისიის 2013 წლის 23 აგვისტოს №7 დადგენილებით დამტკიცებული ფორმების შესაბამისად შევსებული ინფორმაცია საწესდებო კაპიტალისა და აქტივების საკუთრებისა და წარმოშობის შესახებ;

კომისია აღნიშნავს, რომ 2021 წლის 23 მარტს შპს „სეზონი ტვ“-ის მიერ წარმოდგენილ განცხადებაში არ იყო შევსებული: ფაქტობრივი მისამართი; მეწარმეთა და არასამეწარმეო (არაკომერციული) იურიდიული პირების რეესტრში რეგისტრაციის შესახებ მონაცემები; წარმომადგენლობაზე უფლებამოსილი პირის სახელი და გვარი; მონაცემები პარტნიორთა/აქციონერთა შესახებ. საკონტაქტო ინფორმაციაში არ იყო მითითებული კომპანიის ვებ-გვერდი; განცხადების მე-2 და მე-3 პუნქტები შეუსაბამოდ იყო შევსებული, კერძოდ გაურკვეველი იყო სათემო ტელემარშუტებლობაზე სურდა კომპანიას ავტორიზაციის გავლა თუ კერძო საერთო ტელემარშუტებლობაზე.

განცხადებაზე თანდართულ დოკუმენტებში ხარვეზით იყო წარმოდგენილი:

- ა) შესაბამისობის დეკლარაცია. არ იყო შევსებული დეკლარაციის მე-5 პუნქტი;
- ბ) განსახორციელებელი საქმიანობის დაფინანსების გეგმა და ინფორმაცია დაფინანსების წყაროების შესახებ, კერძოდ არ იყო მითითებული თუ რა პერიოდზეა გაწერილი გეგმა; ასევე შემოსავლებში „სესხის აღებაში“ არ იყო მითითებული თანხა, მაშინ როცა გასავლებში „სესხის დაფარვაში“ იყო მითითებული;
- გ) ინფორმაცია საწესდებო კაპიტალისა და აქტივების საკუთრებისა და წარმოშობის შესახებ. ფორმაში არ იყო შევსებული აქტივების შეძენის თარიღი. ასევე შეძენის ღირებულებაში მისათითებელი იყო ზუსტი თანხები.

განცხადებაზე თანდართულ დოკუმენტებში არ იყო წარმოდგენილი:

- ა) განსახორციელებელი სამაუწყებლო კონცეფცია;
- ბ) აუდიტორული კომპანიის მიერ დადასტურებული ცნობა განცხადებული საწესდებო კაპიტალისა და მისი განადღებული ნაწილის შესახებ;
- გ) აუდიტორული კომპანიის მიერ დადასტურებული ცნობა აქტივებისა და პასივების შესახებ;
- დ) მნიშვნელოვანი წილის მფლობელ პარტნიორთა/აქციონერთა ქონებრივი დეკლარაცია.

კომისიამ „მაუწყებლობის შესახებ“ საქართველოს კანონის 45¹ მუხლის მე-5 პუნქტის საფუძველზე განმცხადებელს ზემოაღნიშნული ინფორმაციის წარმოდგენისთვის განუსაზღვრა 5 სამუშაო დღის ვადა (წერილი №გ-21-03/915, 26.03.2021წ.). შპს „სეზონი ტვ“-ის მოთხოვნილი დოკუმენტაცია კომისიაში უნდა წარმოედგინა 2021 წლის 2 აპრილის ჩათვლით. კომპანიას ინფორმაცია კომისიაში მითითებულ ვადაში არ წარმოუდგენია.

კომისიის 2021 წლის 8 აპრილის სხდომას არ ესწრებოდა შპს „სეზონი ტვ“-ის წარმომადგენელი. კომპანიას შეტყობინება სხდომის გამართვის თაობაზე გაეგზავნა 2021 წლის 6 აპრილს.

სხდომაზე აღინიშნა, რომ „მაუწყებლობის შესახებ“ საქართველოს კანონის 45¹ მუხლის მე-5 პუნქტის შესაბამისად თუ საავტორიზაციო განცხადება და თანდართული დოკუმენტაცია არასრულყოფილადაა წარმოდგენილი, კომისია ავტორიზაციის მსურველ პირს დოკუმენტაციის სრულყოფილად წარმოდგენისათვის განუსაზღვრავს 5 სამუშაო დღის ვადას. ამ ვადაში დოკუმენტაციის წარმოუდგენლობის შემთხვევაში ავტორიზაცია არ განხორციელდება. ავტორიზაციის განუხორციელებლობა არ ართმევს პირს უფლებას, განმეორებით მიმართოს კომისიას ავტორიზაციისათვის.

ყოველივე ზემოაღნიშნულის გათვალისწინებით, კომისიამ „მაუწყებლობის შესახებ“ საქართველოს კანონის 45¹ მუხლის მე-5 ქვეპუნქტის და 38-ე მუხლის, ასევე საქართველოს ზოგადი ადმინისტრაციული კოდექსის 53-ე, 95-ე, 98-ე და 99-ე მუხლებისა და VII თავის შესაბამისად, კენჭისყრის შედეგად, ერთხმად

გადაწყვეტა:

1. უარი ეთქვას შპს „სეზონი ტვ“-ის (ს/ნ 417897253) მაუწყებლობის სფეროში ავტორიზაციაზე „მაუწყებლობის შესახებ“ საქართველოს კანონით განსაზღვრული დოკუმენტაციის არასრულყოფილად წარმოდგენის გამო;
2. განემარტოს შპს „სეზონი ტვ“-ის, რომ ავტორიზაციის განუხორციელებლობა არ ართმევს პირს უფლებას, განმეორებით მიმართოს კომისიას ავტორიზაციისათვის;
3. დაევალოს კომისიის ადმინისტრაციას (ნ. შოვნაძე):
 - ა) აღნიშნული გადაწყვეტილების დამოწმებული ასლის შპს „სეზონი ტვ“-ისთვის გაგზავნა;

ბ) აღნიშნული გადაწყვეტილების კომისიის ოფიციალურ ვებ-გვერდზე (www.comcom.ge) გამოქვეყნება;

4. გადაწყვეტილება შეიძლება გასაჩივრდეს ქ. თბილისის საქალაქო სასამართლოს ადმინისტრაციულ კოლეგიაში (მისამართი: ქ.თბილისი, დავით აღმაშენებლის ხეივანი N64) შპს „სეზონი ტვ“-ისთვის ჩაბარებიდან ერთი თვის ვადაში;

5. გადაწყვეტილება ძალაში შევიდეს მისი შპს „სეზონი ტვ“-ისთვის ჩაბარებისთანავე;

6. კონტროლი აღნიშნული გადაწყვეტილების შესრულებაზე (გარდა მე-3 პუნქტისა) დაევალოს კომისიის აპარატის სამართლებრივი დეპარტამენტის ავტორიზაციისა და ლიცენზირების ჯგუფს (მ. ქადეიშვილი).

კახი ბექაური



თავმჯდომარე

ვახტანგ აბაშიძე




წევრი

ეკატერინე იმედაძე



წევრი

ნათია კუკულაძე



წევრი

